

I. DISPOSICIÓNS XERAIS

CONSELLERÍA DE FACENDA

Orde do 29 de maio de 2009 reguladora de aprazamentos e fraccionamentos de pagamentos de débedas que correspondan a ingresos de dereito público da Comunidade Autónoma de Galicia.

O Decreto legislativo 1/1990, do 7 de outubro, polo que se aproba o texto refundido da Lei de réxime financeiro e orzamentario de Galicia, establece, no artigo 20.5º, a posibilidade de aprazar ou fraccionar as cantidades debidas á Facenda da Comunidade nos casos e cos procedementos que regulamentariamente se establezan. A continuación prevé a posibilidade de excepcionar garantías cando sexan inferiores á cifra que fixe a Consellería de Facenda.

O desenvolvemento regulamentario a que antes se alude está composto no ámbito da nosa Comunidade pola Orde do 5 de febreiro de 1997, pola que se determina competencias en materia de aprazamento e fraccionamento do pagamento de débedas tributarias, e a Orde do 17 de febreiro de 2003 pola que modifica a contía das débedas para as que non se exixirá garantía nas solicitudes de aprazamento ou fraccionamento de pagamento e a competencia para a súa concesión.

A recente reforma da organización da Administración periférica da Comunidade Autónoma de Galicia, e a adopción de medidas que favorezan as empresas, autónomos e familias que poidan ter problemas de liquidez, sen perder rigor na xestión das débedas da Comunidade, xustifican a modificación das dúas ordes antes citadas, que se reúnen nunha.

De conformidade coa competencia atribuída polo artigo 7 do Decreto legislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia.

DISPOÑO:

Artigo 1º.-Competencia.

As débedas tributarias e demais de dereito público cuxa xestión recadatoria estea atribuída aos órganos da consellería competente en materia de facenda poderán ser aprazados ou fraccionados, mediante resolución, polo director xeral de Tributos, subdirector xeral de Recadación, xefes territoriais dos departamentos de Facenda, xefe do servizo central de recadación, xefes dos servizos de recadación e xefes dos servizos de xestión tributaria, de acordo coas seguintes contías, natureza das débedas e tipos de garantía exixibles:

Director/a xeral de Tributos.

Correspóndelle a inadmisión ou resolución das solicitudes de aprazamento e fraccionamento de pagamento cando, non estando expresamente atribuída a outros órganos:

A contía total da débeda exceda os 300.000 €.

Se solicite a dispensa total ou parcial de garantías.

Subdirector/a xeral de Recadación e xefes/as territoriais dos departamentos de Facenda.

Correspóndelles a inadmisión ou resolución das solicitudes de aprazamentos e fraccionamentos de pagamento cando, non estando expresamente atribuída a outros órganos, a débeda total non exceda os 300.000 €.

Xefe/a do Servizo Central de Recadación e xefes/as dos Servizos de Recadación.

Correspóndelles a inadmisión ou resolución das solicitudes de aprazamentos e fraccionamentos de pagamento cando lles sexa de aplicación a exención de garantías en atención á contía da débeda.

Xefes/as dos servizos de Xestión Tributaria.

Correspóndelles a inadmisión ou resolución das solicitudes de aprazamentos e fraccionamentos de pagamento solicitados que, ao abeiro do disposto na normativa reguladora dos impostos sobre sucesións e doazóns e transmisións patrimoniais e actos xurídicos documentados, se atribúen especificamente aos órganos competentes para a xestión e liquidación destes.

Artigo 2º.-Avocación.

O/a director/a xeral de Tributos poderá avocar a competencia para acordar o aprazamento ou fraccionamento de pagamento en expedientes cuxa especial transcendencia o aconselle e cuxa xestión corresponda aos órganos de recadación.

Artigo 3º.-Presentación de solicitudes.

As solicitudes de aprazamento e fraccionamento de pagamento, con independencia do órgano competente para a súa resolución, presentárase ante o Servizo de Recadación en cuxo ámbito territorial estea situado o órgano de que proceda o acto que orixina a débeda.

Artigo 4º.-Garantías.

Non se exixirán garantías para as solicitudes de aprazamento e fraccionamento de pagamento de débedas que constitúan ingresos de dereito público de Comunidade Autónoma de Galicia cando o seu importe en conxunto non exceda de 18.000 euros e se encontren tanto en período voluntario coma en período executivo de pagamento, sen prexuízo do mantemento, neste último caso, das trabas existentes sobre bens e dereitos do debedor no momento da presentación da solicitude.

Para os efectos da determinación da contía, acumularanse no momento da solicitude tanto as débedas a que se refire a propia solicitude como calquera outra do mesmo debedor para as que conste que se solicitase e non resolverse o aprazamento ou fraccionamento, así como o importe dos vencementos pendentes de ingreso das débedas aprazadas ou fraccionadas, salvo que estean debidamente garantidas.

Disposición transitoria

As solicitudes de aprazamento e fraccionamento pendentes de resolución no momento da entrada en vigor desta orde seguirán rexéndose polo establecido na normativa vixente na data de presentación da correspondente solicitude.

Disposición derogatoria

Quedan derogadas as ordes da Consellería de Economía e Facenda do 5 de febreiro de 1997 que determina competencias en materia de aprazamento e fraccionamento do pagamento de débedas tributarias e do 17 de febreiro de 2003 pola que se modifica a contía das débedas para os que non se esixirá garantía nas solicitudes de aprazamento ou fraccionamento de pagamento e a competencia para a súa concesión.

Disposición derradeira

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 29 de maio 2009.

Marta Fernández Currás
Conselleira de Facenda

CONSELLERÍA DE MEDIO AMBIENTE, TERRITORIO E INFRAESTRUTURAS

Decreto 316/2009, do 4 de xuño, polo que se establece a estrutura orgánica da Consellería de Medio Ambiente, Territorio e Infraestruturas.

O Decreto 79/2009, do 19 de abril, polo que se establece a estrutura orgánica da Xunta de Galicia, supón a plasmación do compromiso de austeridade, eficacia e eficiencia no deseño e funcionamento da Administración da Xunta de Galicia adquirido polo Goberno galego.

Esta nova dimensión organizativa reflíctese xa no Decreto 83/2009, do 21 de abril, polo que se fixa a estrutura orgánica dos departamentos da Xunta de Galicia, que no seu artigo 3 establece unha estrutura da Consellería de Medio Ambiente, Territorio e Infraestruturas que implica a redución por fusión e a racionalización da estrutura que anteriormente tiñan asignadas tres consellerías.

Dentro deste proceso cabe aludir, pola súa relevante significación, en termos de austeridade, eficacia e racionalización da xestión, á reformulación da estrutura da Administración autonómica periférica da Xunta de Galicia operada coa aprobación do Decreto 254/2009, do 30 de abril, polo que se regulan as delegacións territoriais da Xunta de Galicia.

Estes cambios esenciais na filosofía organizativa e na xestión pública deben ter a necesaria continuidade na configuración da estrutura orgánica da Consellería de Medio Ambiente, Territorio e Infraestruturas, co obxecto de responder ás demandas e necesidades que require a xestión do ámbito competencial propio, atendendo a criterios de eficiencia e racionalidade no gasto público.

Seguindo estas premisas, o novo modelo de estrutura orgánica aposta por unha clara redución e simplificación de órganos que se constata, de maneira particularizada, na supresión de unidades como consecuencia da fusión das anteriores consellerías de Medio Ambiente e Desenvolvemento Sostible, Política Territorial, Obras Públicas e Transportes e Vivenda e Solo.

En particular, polo que se refire á estrutura da Administración periférica, este decreto recolle o modelo organizativo plasmado no Decreto 245/2009, do 30 de abril, de tal forma que, en aplicación dos principios de racionalidade, eficiencia e austeridade, o Departamento Territorial de Pontevedra estende a súa competencia a todo o ámbito provincial, sen prexuízo das funcións de coordinación que corresponden aos/ás delegados/as territoriais de Pontevedra e Vigo no seu respectivo ámbito competencial, de acordo co artigo 2 da norma citada.

De conformidade co exposto, por proposta do conselleiro de Medio Ambiente, Territorio e Infraestruturas, no exercicio da facultade outorgada polo artigo 34.4º da Lei 1/1983, do 22 de febreiro, de normas reguladoras da Xunta e da súa Presidencia, co informe previo da Consellería de Facenda e logo da deliberación do Consello da Xunta de Galicia, na súa reunión do día catro de xuño de dous mil nove,

DISPOÑO:

TÍTULO I

ÁMBITO COMPETENCIAL E ORGANIZACIÓN XERAL DA CONSELLERÍA

Artigo 1º.-*Ámbito competencial.*

A Consellería de Medio Ambiente, Territorio e Infraestruturas é o órgano de administración da comunidade autónoma ao cal lle corresponden as competencias e funcións en materia de ambiente, ordenación do territorio e urbanismo, vivenda e solo, infraestruturas e mobilidade consonte o establecido na EAG nos termos sinalados na Constitución española e que exercerá no nivel de desenvolvemento que se indica neste decreto para cada un dos órganos integrantes deste departamento.

Artigo 2º.-*Estrutura da consellería.*

A Consellería de Medio Ambiente, Territorio e Infraestruturas, baixo a superior dirección do/a seu/súa titular, contará para o exercicio das súas funcións coa seguinte estrutura orgánica:

a) O/a conselleiro/a.